

青州府志卷三十六

傳一之三

名宦傳三

明

歐陽銘江西廬陵人洪武元年知臨淄縣副將軍常遇春略定未附郡縣過臨淄兵士十餘人入人家取酒不得相歐擊謹動一市銘出呵止不服因笞遣焉且往見將軍白之軍校先走告軍門曰知縣毆卒幾死且罵將軍不戢士常公召銘詬之曰汝何敢爾銘曰軍固王師民亦王民也民被毆擊幾死軍士固不可笞耶此軍士之過知縣雖不

青州府志卷三十六

賢豈敢他有詈言常意解乃獨責軍士而釋令由是嚴申約束無敢譁者

趙復浙江鄞縣人洪武元年知樂安縣剛毅明斷兵燹之後創建文廟橋梁公私不擾至今稱之

劉子華宜春人明春秋工於詩詞洪武初召見命賦開平王常遇春挽詩子華援筆立就帝大悅問吏部何缺乏人得青州推官政績茂著有聲於時

金汝穆舉人洪武初知諸城縣縣前志云開創之初百務叢集修建經營悉殫厥心

王公懋洪武初爲高苑縣丞有盜賊數十人入城劫掠民

不能禦公懋率民兵捕之賊拒捕傷公懋左耳不爲動擊殺二人餘皆擒之事聞賜綺幣旌之

王鐸陝州閿鄉人洪武中知壽光縣勸農桑興學校均賦役招捕亡遷擢之曰萬民遮道泣留

陳章應福建晉江人進士洪武中由榆次縣丞遷安邱縣知縣吏治肅清一邑稱最會詔求政績異等藩臬考其政治通敏才品清醇遂應詔上嘉其廉幹降旌善榜以示激勸遷禮部主事

陸演浙江西安人監生洪武中爲安邱縣典史資性明敏才能治劇遷山陽知縣累官至監察御史

青州府志卷三十六

二

謝中江西廬陵人舉人洪武十一年知樂安縣修舉廢墜務以德化民

朱允恭本姓陳陝西保安人洪武十五年知諸城縣清介不阿忤權貴被誣謫戍雲南二十一年縣人詣闕保奏上諭吏部曰爲國以任人爲本作奸者不可以小才而貸之果賢者不可以小疵而棄之奸者必懲庶不廢法宥過而用則無棄人朱允恭前任諸城以簿書之過責戍雲南比有言其治縣時能愛民者夫長民者能愛民雖有過可用也於是召還復職仍遣使齎禮物勞之卒於官

孫隆洪武二十一年知臨淄縣建四鄉倉以利民

于子仁湖廣武岡人初爲昌樂縣丞明斷不苛每以經術飾吏事洪武二十四年縣人詣 保其廉能寵錫金幣升知本縣遷登州府民不忍其去爲立生祠

任佑河南靈寶人監生洪武二十七年知諸城縣精勤廉幹愛民如子遷永平府同知累官至四川右布政使

權謹徐州人永樂初知樂安縣在任九年持公如一以事母孝聞於朝官至文華殿大學士

姚著遷安人永樂四年知臨淄縣廉勤公謹以循良稱善文學多著述遷廣東高州知州

侯保永樂四年知博興縣三月民頌其明

青州府志卷三十六

三

于潛河南鄆陵人永樂七年以監察御史出知昌樂縣泣政嚴明革除姦弊三年報政以治最稱累官至順天府府尹

張旛山西榆次人監生永樂十六年知安邱縣會妖婦唐賽兒黨賓鴻等攻掠安邱旛與縣丞馬搗率民兵八百人以死拒戰賊敗復集衆攻城會備倭都指揮衛青率千騎至旛出城中兵合擊大敗之斬首二千餘級生虜四千餘人卒全安邱事聞擢山東左參政賜襲衣金帶

馬搗陝西人監生爲安邱縣丞與知縣張旛同力拒賊有功擢山東左參議賜衣帶

彭自勗江西貴溪人舉人永樂中知臨淄縣好學崇文敏於政治獄訟無滯從容翰墨無廢事焉

鄭冕直隸昌黎人永樂中以吏員爲安邱縣丞爲人長厚佐政公勤百姓愛服遷工部主事

孟迪山西太原人貢生永樂間知青州承積弊後振壅塞補罅漏各中機宜屬邑豪吏有飾詐挾上流毒閭里者廉得其狀械斃於獄民情大快比歲蝗督屬捕之稼不爲害歲饑勸民出粟備振民咸德之

陳勛沔陽州人舉人宣德初以吏部司務考最出知青州教民孝弟力田每行縣省耕繪爲勸農圖興學造士文風

青州府志卷三十六

四

丕振後以足疾告歸

張輔山西保德州人監生宣德四年知安邱縣鋤強抑暴盜賊屏迹去後行李蕭然百姓立祠祀之

高軒南直廬江人監生景泰初知樂安縣執法不阿豪強懾服

于正四川內江人舉人景泰間知諸城縣爲人子諒有吏才遷莒州

趙偉山西潞安人貢生初判萊州卓有聲望天順二年遷知青州修衙署飾學宮傳舍堂階亭館咸重新之民不知疲未三年百廢俱興民有父子三人犯死罪偉憐其乏嗣

委曲活其一焉

章彝蘇州人天順二年爲昌樂縣教諭經明行修勤於訓誨師範偉然

狄惠南直人監生天順五年知樂安縣處事公明操行不苟

謝績冀州人舉人天順七年知安邱縣廉幹勤謹百廢俱興歷八年如一日百姓立祠祀之

卜釗江南潁上人監生天順中知臨朐縣爲政以平易節儉爲本尤能體悉羣情民爲立德政碑以表之

楊昕浙江麗水人舉人成化初知壽光縣廉明剛直勇於

青州府志卷三十六

五

去惡時有害民者號爲七虎昕案治之而民以安卒於官民爲立祠祀之

葉忠江西玉山人舉人成化初爲樂安縣教諭端正自持教諸生有法宏治間士人追思之請祀名宦

張泉陝西人監生成化元年爲昌樂縣丞廉能剛斷治稱第一

趙錦河南祥符人成化元年爲昌樂縣主簿廉介不阿人稱能吏

蔣芳江南盱眙人成化元年爲昌樂縣訓導廣立條約以相砥礪士皆宗之

李昂浙江仁和人進士成化二年知青州先是逃亡接踵昂至問民疾苦首劾臧吏量貧富均徭役募民辟田而緩其課歲饑開倉振濟不足復移歲輸助之勸富民爲粥食餓者全活甚衆法吏以不請論昂歎曰民旣生全罪復何憾自劾乞罷下部議詔所移粟與輸官同特嘉獎勵昂尤慮饑饉後民不能耕親行阡陌給以牛種其惇嫠無告者闢廬棲之殫心學校教民親遜俗用丕變流移復歸鄰邑歸附者至三千餘戶父老歎曰不圖今日復見富公也
蔣鳳直隸肥鄉人監生成化二年知臨淄縣縣城傾圮鳳易以甃石稱完固焉

馬亮順天大興人舉人成化五年知樂安縣清慎嚴明門無私謁抑豪強勸農桑民咸愛之

安盤武邑人監生成化五年爲高苑縣主簿立心公直作事平允在任九年始終不易

閻鼎直隸深州人進士以監察御史忤中貴成化七年出知諸城縣建滄浪書院及旬宣牧愛宣化明教儒林皇華肅綱宣威鎮海迎恩十坊卒於官士民至今思之

趙珂成化十年知博興縣居官九載政聲大著

陳文偉廬州舒城人舉人成化十一年知博興縣剛介廉正吏民畏服興學校勤課士倡導水利教民力田凡有凶

年必籌振濟

又詳安邱

章倬湖廣善化人舉人成化十一年知諸城縣爲政豈弟吏民愛之致仕歸

王緬浙江山陰人舉人知樂安縣立心寬慈爲政簡易嘗發粟振饑鄰縣賴以全活者甚衆

奚銘順天宛平人進士知樂安縣廉明善斷案無留牘除弊懲奸人知向善稍暇輒詣明倫堂進諸生講授經義歲凶招集流亡勸課農桑民不失業以考最行取御史

沈清浙江歸安人進士成化十五年知樂安縣廉明仁愛賦役均平遇蝗而禱蝗盡死建社學立規條優廩給童穉

青州府志卷三十六

七

咸得肄業訟簡盜息屢致豐年文廟壇壝橋梁道路無不

修飭在任五年

舊志作三年

行取御史

方璈四川簡縣人知壽光縣歲饑盜起疫癘流行璈盡心振卹民賴以安

鄭珏河南歸德人成化十六年知壽光縣值歲凶撫綏有方流民復業者千餘家興學勵才訟簡盜息民服其化

廉政山西潞州人舉人成化十七年知安邱縣廉明剛方尤嚴祀事祭物豐潔嘗親滌牲於河率諸生宿齋舍蓋所謂必誠必信者

彭連饒陽人舉人成化二十年知高苑縣公敏廉恪廣儲

節用在任九年終始如一

張連河南鞏縣人進士成化二十年知臨朐縣歲大旱餓者相屬於道連勸富民出粟振之民賴以生洩政三年行取御史

馮廣河南鄭州人進士成化間知諸城縣政平訟理公餘親製藥餌以療民病置漏澤園自爲碑記之

李麟直隸樂亭人成化間爲諸城縣教諭勤於課士嘗謀諸知縣馮廣買地以徙學前居民蓋善形家言爲縣中科目計也

孔公易衢州人貢生成化間爲高苑縣訓導學問淹通無

青州府志卷三十六

八

忝師範

曹安直隸華亭人成化間爲安邱縣訓導動履端方文詞博雅諸生皆愛敬焉

侯敬河南靈寶人舉人宏治元年知臨淄縣果敢廉明以崇學校爲首務築城池繕倉庫吏民安輯遷邠州知州方天然江都人宏治元年知昌樂縣政務修明以廉能著稱歲饑振濟有方全活甚衆

趙誠江南蒙城人宏治元年以吏員爲昌樂縣典史奉法無私佐縣令以有爲政聲大著

馮傑順天涿州人進士宏治二年知諸城縣爲政平恕務

持大體歷官兵部副使爲賊所執不屈死撫按上其事蔭一子世襲百戶

郭桂陝西咸甯人進士宏治四年知安邱縣以清節自勵其讞決無大小不崇朝而畢期年境內晏然

張禮山西石州人知博興縣剛正廉介政治修明卒於官遠近哀之

馬繼祖如皋人宏治五年知博興縣寬厚仁愛涖政明敏歲饑申請當事悉力以振全活者甚衆

徐海常山人進士宏治十一年知高苑縣廉介自持公嚴執法發姦摘伏人不敢欺累遷至廣東僉事

青州府志卷三十六

九

鄧萬斛四川富順人進士宏治十一年知諸城縣性明敏發姦摘伏胥吏斂迹縣地濱濰水者多沒於沙不可耕民苦之紛紛逃竄萬斛請免賦稅命下行勘未報以憂去民多攀轅泣送者

何鈺河南靈寶人宏治十三年知博興縣天性鯁介勤政愛民盜賊胥化百姓歌之

瞿唐長垣人進士宏治十四年知壽光縣涖事勤敏聽斷若神尤崇學校與多士相接情文兼至

姚湘直隸順義人貢生宏治十五年知臨淄縣廉慎有守能識大體遷大同府通判

陳文偉舒城人宏治十八年由博興調安邱知縣剛正廉
介人不敢干以私時流賊數十輩突入縣署掠庫金而去
文偉俟其行將三十里挾彈乘一騎馳追之識其爲首者
彈發中左目再彈中右目賊衆大駭伏地請死文偉第
爲我送金還庫當貸一死賊唯命文偉以一騎尾其後抵
縣羣賊請死文偉笑曰不足污吾刃悉杖而遣之
蔣瓊大興人進士宏治中知臨朐縣才識英敏馭民以恩
卒祀名宦

崔明直隸香河人進士宏治中知諸城縣寬而有體以幹
濟稱官至參政

青州府志卷三十六

十

楊和固安人舉人宏治中爲青州府學教授性嚴正條教
有法士風爲之丕振人以爲後先無比云

周致浙江鄞縣人進士宏治間知臨淄縣勤慎廉直士民
悅服攝篆益都以事謁上官至濟南卒於逆旅兩縣民爭
迎其柩立祠祀之督學使者陳琳爲之記

李溥直隸正定人進士宏治間知樂安縣聽斷精覈有神
明之稱

劉金順天三河人進士宏治間知樂安縣清正廉明不爲
苛察每聽斷必諭以理民皆向化行取御史

鄭奇河南光州人舉人正德初知諸城縣政事練達不勞

而治遷滄州知州

楊謙山西聞喜人舉人正德初由武城調繁諸城縣性剛嚴吏民畏懾無敢犯者

顧標福建莆田人進士正德元年知高苑縣廉明嚴厲治行稱最以憂去攀轅泣送者數千人

牛鸞獻縣人進士正德二年知益都縣時劇賊劉六等轉掠山東曹濮淄澠間所過城邑望風奔潰獨鸞與樂陵知縣許達東西相應屹若巨鎮鸞尤臨機設變出入若神賊嘗縱兵圍城三市鸞日夜距守賊乃退鸞曰此特自完計耳不一大創賊必復來乃率子弟兵及諸亡命躡賊戰大

王橋身被四矢扶創而鬪賊遂大奔斬獲無算賊自是不復東矣事聞擢按察司僉事

許讚河南靈寶人正德四年以翰林院編修出知臨淄縣爲政練達士民稱便累官至內閣大學士

謝譽山西安邑人正德五年知昌樂縣廉明剛直有循吏風六年春流寇起民因譽入覲力不能支避盜青州譽至自京師招集散民泣諭歸守民皆悅從六月二十六日流賊張興率千餘騎攻城譽奮力卻之城獲完遷泰安州知

州

張良弼河南屯留人舉人正德六年知壽光縣縣城頽壞

久不修葺良弼至歎曰垣墉不固其如民何計畫甫就會入覲而止比還城已爲流賊所破遂申前議不三月而城完後以事罷職士民惜之

雷起東河南儀封人進士正德六年知臨朐縣勤於涖政寬以卹民縣城再爲流賊所破浚築城塹聚鐵鑄兵爲守備不兼旬而辦聞賊將逼城命鄉人各挈其家及芻粟入城清野以待賊經營甫定而賊衆驟至起東督率丁壯捍衛號令嚴肅寂然無譁賊旣莫識城中所爲野無所掠圍三日相與驚歎而去

王緒陝西華陰人舉人知諸城縣正德六年霸州流賊劉

六劉七齊彥名等分掠山東連陷樂安安邱悉衆攻諸城時太平久民不識兵城中哭聲振天地緒誓以死守躬督千戶張武義勇丁紀等分守城門嚴號令明賞罰預引扶淇水注滿池隍賊不能近踰旬聞官兵躡其後遂解圍去城賴以完

申良山西高平人舉人正德八年由招遠調諸城知縣性嚴正無所假借朝廷採錄山東宦績良爲首舉先是良在招遠會土寇起膠萊間預爲戰具寇至悉斬卻之及宰諸城亦有保障功民懷其德兩縣皆肖像祀之

李階永嘉人進士正德九年知壽光縣明於聽斷寬以催

科民間有秋月寒冰之頌

郭郊直隸肥鄉人進士正德十一年以青城知縣左遷諸城縣丞公明練達舉措悉中禮則尤加意學校士人多愛重之官至某部主事

李珏開州人進士知青州儀容端偉學識宏博訟者以情法諭之令其省改久之民輒戒曰吾甯自相輯睦毋令我公知也其善於化民如此官至大理寺卿

徐縉江都人進士正德十四年知青州剖決滯獄舉劾屬吏民皆悅服懲姦猾理侵漁諸凡興革率躬先之論太公開齊功並周公獨無廟祀卽五龍堂肖像祀之配以管晏

歲時祭享慮傷民財毀無名寺觀以充之或阻以鬼神禍福竟無所動獎掖後學敦尚氣節士風大振卒於官

孫峻江南高郵人正德十五年知壽光縣抑豪強崇士類民皆懾服遷兵部主事

何洪山西守禦千戶所人舉人正德十六年知昌樂縣泣政有爲遷德州知州

李獻可北直故城人進士正德中知青州俗素強悍獻可先榜諭之有不悛者始加懲治鞠獄必察其強弱善惡而輕重焉有應戍者輒曰與其遣罪人而勞良民孰若重懲而令其悔悟也久之刁訟自息民用樂業以最調開封府

士民爭攀留之

藍瑞河南人正德中爲青州府推官涖政廉明吏民畏懼卒於官

姚文明山西潞州人舉人正德中知臨朐縣當流賊傷殘之餘撫綏遺黎躬勸農桑清介自勵不事刑威而民自服遷順天府通判

劉珣廣東新會人正德間爲諸城縣教諭有文名勤於課士遷荔浦知縣

王九純浙江永嘉人正德間爲諸城縣訓導講學根據理要尤工古文詞遷竹山縣教諭官至黃州府教授

青州府志卷三十六

十四

張勛正德間高苑縣防城指揮時流賊楊寡婦寇掠州縣兵備僉事許遠擊之於濰賊將走滄州勛度其必從縣西間道而逸乃勒兵要之斬獲甚衆自是賊不敢窺青州張裕山西太平人監生嘉靖初知臨朐縣御民寬恕決獄平允嚴禁豪猾姦邪斂迹時稱山東三令裕其一也劉竹直隸晉州人進士嘉靖初知諸城縣謹厚清苦撫字勤勞卒於官易簣之夕有因其貧而誘之以利者竹弩目叱之

紀資任邱人嘉靖二年進士知青州鋤強抑暴豪右斂迹屬吏有不戢者必庭詰之嘗曰少年入仕情多恣傲上復

優容是姑息也一時俊銳之士殆不自堪然卒賴以成立
政暇進諸生論文崇雅黜浮科第自此漸盛遷按察司副
使厯苑馬寺卿

周原鄆縣人嘉靖二年知昌樂縣有文望鞫獄平允人皆
稱之

張集直隸晉州人進士嘉靖三年知博興縣當兵燹之後
招流亡寬逋賦撫犂獨墾荒田修城隍興學校舉祭祀獎
節義除道途百廢俱舉士民稱之

李錞直隸人嘉靖三年由朝城調知昌樂縣清修雅重動
循禮法廉明大著累遷至江西參政

青州府志卷三十六

十五

張儒尉氏人嘉靖四年爲臨淄縣丞民俗疲敝佐縣令以
寬處之縣人呼爲張佛五年以年老告歸

褚寶懷遠衛人舊志作鳳陽人嘉靖八年進士知臨朐縣善屬文

勤課士公餘進諸生講藝亶亶忘倦又置義學數處擇師
其中以教里中子弟之貧者由是科名日盛去後縣人建
祠肖像祀之

劉廷儀慈谿人嘉靖十七年進士由監察御史出知青州
性耿介疾世多阿諂及吏之貪墨鬪葺者語及辭色輒厲
衆憚而忌之時監司行部至廷儀與之語侃侃而談略無
忌諱監司不悅婉詞譏之廷儀不爲動卒以失上官意左

遷運佐

胡宗憲績谿人進士嘉靖十七年知益都縣倜儻不羈嚴信賞罰民咸服之擢監察御史

杜鏞襄陵人舉人嘉靖十七年知高苑縣持身清儉爲政嚴明邑中姦猾懲刈殆盡遷濮州知州

賈東山山西蒲州人舉人嘉靖二十二年知臨朐縣建忠愛堂立鐘鼓樓修壇壝置鋪舍皆以民力成之而民不告勞人以爲德化所感云

朱木常熟人嘉靖二十四年知昌樂縣爲政勤敏以德化民修學宮重文獻剔弊興利有古循良風昌樂有縣志自

青州府志卷三十六

十六

木始

陳儒錦衣衛人進士嘉靖二十五年以山東左布政使左遷青州兵備僉事廉幹素著在任數月四境肅然闐闐之間無敢夜行者然能持大體不爲苛細吏民安焉累官至南京戶部尚書

魏怡北直南樂人選貢生嘉靖二十六年爲青州府捕盜通判嘗建層樓於府館以爲扞衛治民以恩用法卓有政聲去之日積羨金四百兩留爲郡邑經費錙銖不入私橐民爲立生祠於范公祠後至今存焉

葛臣固始人舉人嘉靖二十六年知高苑縣創修縣志時

新城有以決蔡家口洩清沙泊水誣控縣民者臣立爲解
辯卒得無恙縣無科第者四十餘年臣創立書院嚴課生
徒科名以興民爲立祠祀之

王家士河南光山人舉人嘉靖二十六年知臨朐縣有學
識創修縣志

李宗樞陝西富平人進士知諸城縣性方嚴人不敢犯邑
有霸占民田者悉案治之縣東瀕海秋成羣盜每竊禾泛
海去前令多不能制宗樞設法防捕海盜屏迹在任三年
百廢俱興行取御史累官至都御史

鄭坤河南光州人進士知諸城縣性冲和平易近人而民

青州府志卷三十六

十七

不敢狎懇荒田拓學基振興文教軫卹困窮三年行取御
史累官至都御史

安臣河南偃城人爲諸城縣丞慈祥坦易藹然可親而堅
持之操人不敢犯嘗爲義民邱儀辯冤獄酬以金斥不受
後告歸士民攀轅送之

祝天保直隸唐山人進士嘉靖二十七年知諸城縣性剛
正不事操切邑有不率教者繩之以法然亦無苛求故人
畏而愛之行取戶部主事累官至山西參政

吳悌江西金溪人進士知樂安縣學問淵邃政事優長聽
斷之暇卽造黌舍爲諸生講解經義甫期年以治劇才調

南直宣城縣士民留之不得蓋格於例云

郭中河南祥符人進士嘉靖二十九年知樂安縣慈祥樸素清廉有守士民稱之

張芹山西孝義人進士嘉靖二十九年知安邱縣勤於聽斷案無留牘閭閻窮民尤加惠焉以憂去父老遮道泣送者終日不絕

潘鈇婺源人以刑部郎中知青州體貌清癯若不勝衣日親案牘剖決無滯尤能以法治抑豪右人咸以食少事煩慮之官至參政

按汝甯府志鈇字希行婺源人進士嘉靖三十年以青

州知府遷汝南副使鈇在青州時屬吏益都縣丞黃河以戇直獲罪於鈇因棄官歸踰年鈇至河讐谷仁等乘機構訟人謂河必遭重譴迨鈇庭鞫大直河而痛懲仁等由是人知鈇捐棄成心矢公持正訟獄爲之一清

杜孔祿河南人歲貢生嘉靖三十年爲博興縣丞縣民某因負課鬻其子女孔祿代爲之償而贖其子女以歸嘗行阡陌遇有父子兄弟共挽而耕者以俸資之並繪圖上當道請置官牛五百頭以助民耕政聲大著

楊繼盛直隸容城人進士初授南京吏部主事改兵部車駕司員外郎以劾仇鸞謫陝西狄道縣典史嘉靖三十一

年遷知諸城縣凡所措施率以鋤強暴綏善良爲務繼盛嘗自述曰諸城濱海俗甚強悍予治事不數日民皆守法吏不敢欺月餘調南京戶部主事遷刑部員外郎縣人陳燁等送至濰水之陽繼盛降輿揖衆抗言嚴嵩擅權納賄害天下吾必劾之衆相顧愕然後果以劾嵩棄市縣前志云繼盛以嘉靖三十一年至縣年方三十七身在長短之間容儀秀雅面圓色皙兩鬢下鬚連蜷長寸許漆色如虬目多白晴瞻之有威而談笑娓娓不倦與人無厓岸善射去之日輿中猶懸弓矢其沒也士民亟擬祠祀之時有縣人爲朝官者與有隙阻之後乃與楊天民合祀焉

青州府志卷三十六

十九

季永康直隸倉州人進士嘉靖三十三年知諸城縣積學有守賦性贛直以憂去人皆思之

王世貞太滄州人進士嘉靖三十五年爲青州兵備副使青故多大姓竊采山賁海以相雄長其徒蟻附往往恃衆犯上世貞奉璽書觀察渠魁徐子由三檄不至計擒而置之法黨與解散嘗行部抵顏神鎮覽其形勢曰此巖邑也往者賊屢倡亂莫不據此爲姦乃倡建石城三月而就民賴以安累官至南京戶部尚書

黃景熙河南光山人知臨淄縣爲政廉平以憂去送者萬人人以爲惠愛所感云

馮舜漁山西蒲州人進士知臨淄縣興育人才選優等李士茹李春陽等後皆爲循吏縣人至今傳誦之

衛心山西陽城人進士嘉靖三十五年知臨淄縣剛明嚴毅爲政有體以治最稱

郭鎮直隸雄縣人舉人嘉靖三十九年知臨胸縣招流移墾荒蕪嚴緝捕理冤獄賦稅不取毫羨胥吏盡皆斂迹時旱蝗鎮禱於神羣鳥啄之頓盡說者謂至誠所感以年老乞休百姓思之

李尙智屯留人進士知青州政務明決綱紀修舉清苦之操尤令人思之不忘云

青州府志卷三十六

二十

杜思鄆縣人進士嘉靖四十二年知青州溫文好學以郡志未修故實湮沒乃聘文士薛晨等揆考遺書本通志齊乘及郡人李時颺少陽乘等書輯爲郡志人稱綜雅談經課藝名士奮起科第亦自此稱盛云

熊茂江西安義人舉人知博興縣在任五年獄平賦均百姓立祠祀之

顧楫浙江仁和人舉人知博興縣歲大旱步禱輒雨重學校親文士廣立鄉學以教百姓三十年間文風大振有二尹者黜非其罪貧不能歸楫厚遺之迨楫之去也囊空一如二尹去時

盧源北直易州人歲貢生嘉靖四十三年知博興縣敷政明教庶務咸新初邑人崔江劉經等以武安廟傾圮積資修之前令王三捷助以米二千石鳩工數年未就源至卽捐千金數月告竣邑人張繼芳爲碑記其事以語源源笑曰不在是也又嘗修城樓縣治皆不爲記其爲政以實不以名類如此

馬時泰河南陳留人舉人嘉靖四十三年知諸城縣諳習世故體卹民隱凡所措施皆合機宜行取南京工部主事遷太僕寺卿

楊相山西蒲州人進士嘉靖四十四年以御史出爲青州

青州府志卷三十六

二十一

兵備僉事秉憲體飭吏治好士禮賢以古道自持遴兩學諸生數十人爲文社出俸以給膏火三日一試自品其文因以成就者甚衆

張濟陝西醴泉人進士知壽光縣持身凝重言笑不苟政簡民熙四境晏如

羅材廬陵人舉人知壽光縣天性寬和愛民如子施不邀惠寬不弛法人以羅佛呼之遷廣平府通判

郭民敬浙江山陰人進士知壽光縣爲政嚴厲不尙姑息人咸以閻羅目之

王文翰山西汾州人進士知壽光縣御民寬平而嚴戢姦

盜累薦卓異以忤中貴罷職

溫純陝西三原人進士嘉靖四十四年知壽光縣居官廉明立法嚴整修學校廣學田爲諸生立文會親臨考課除漏例減徭役政平訟理大著賢聲邑人勒石紀其政

王應吉山西襄陵人進士嘉靖四十五年知安邱縣律身廉潔爲政惠愛在任數年民咸樂業

劉有誠山西甯鄉人進士嘉靖間以山東布政司參政署青州兵備僉事時賦役煩苛民累逃亡有誠乃延問耆老苦心調濟裁浮稅均徭役百姓如離湯火流移頓復以疾卒於萊署喪過青民猶哭奠於路云

青州府志卷三十六

二十二

唐維城福建莆田人進士嘉靖間知青州州有豪宦恃勢陵人巡按廉得之以屬維城維城盡置諸法民情大快卒於官囊無十金之羨僚屬爲備棺殮焉

王度深澤人進士初爲益都縣臨事周詳斷獄明允在任五年吏民安之內遷戶部主事旋出知青州慈祥樂易一如爲令時

王化蕭縣人貢士嘉靖間爲高苑縣教諭有藻鑑待士篤於恩義去之日諸生多流涕以送者

周易句容人舉人嘉靖間爲高苑縣教諭崇禮教卻餽遺講學論文不間寒暑遷昌化知縣送者泣下

游新佑福建福清人舉人嘉靖間爲諸城縣教諭穎異有識同僚有卒於官者資之以歸遷香河知縣改吉安府教授

張大籓廣東順德人舉人嘉靖間爲諸城縣教諭督士甚勤淡泊自奉數年不攜家累處之泰然遷昌樂知縣

浦楫江陰人選貢生嘉靖間爲青州府學訓導博文多識動履端謹鄰邑之士多有執經就講者重修郡志屬草粗就以憂去

屈直裕州人貢士嘉靖間爲高苑縣訓導學識淵邃勤於課士嘗捐俸錢以資膏火貧者逾格助之後以事罷歸諸

青州府志卷三十六

二十三

生思之不忘

王惟幾順天文安人進士隆慶元年知樂安縣爲政勤謹斷獄敏捷禮賢好士抑強扶懦清賦役興學校修城鑿池未竟厥施五閱月而卒士民惜之

袁槍懷遠人貢生隆慶三年知高苑縣性廉介爲政勤謹催科不事鞭扑賦稅自完歲旱布衣步禱甘霖輒應嘗扁示賓堂畫芥一株以自警遷東昌府通判

王三錫四川內江人進士隆慶四年知諸城縣性坦夷無城府然不可以私干豪右畏之自奉儉約取民有制遷戶部主事累官至按察司副使

宋存德南京錦衣衛人進士隆慶五年知安邱縣寬厚慈愛百姓號曰宋佛先是邑有水患賦多逋存德至一切緩之後竟以此被劾百姓聞之若失慈父母焉

姜璧順天文安人進士隆慶六年知樂安縣縣有三大猾恃勢厲民前令莫敢撻璧至廉得其情盡置諸法時淄水潰決沿河之地禾稼盡沒璧親履查勘築長隄數十里以障之民以無恙職滿遷官仕至都御史

趙楫浙江山陰人進士隆慶六年知諸城縣值歲稔民多流亡楫委曲招撫聽民墾荒田限三年後始起科復業者千餘家縣多大猾暴橫鄉里楫拘其渠數人置之法田賦

青州府志卷三十六

二十四

久不均楫密訪問閭洞悉其弊選省察等官分丈其地而以行誼推於鄉者輔之別肥瘠爲三等吏民不敢欺每朔望詣學宮詔諸生勸以積學力行其貧者捐俸助之擢御史累官至湖南巡撫百姓思之爲立生祠於西甯門內刻碑紀其善政

李學道浙江人萬曆初以御史出知青州歲大水民不聊生學道撫振蠲租心力畢瘁卒於官

苗勃然北直曲周人進士萬曆二年知臨朐縣性剛無所偏倚凡有興除務在必行衆不能奪

張永年直隸慶都人萬曆四年爲安邱縣典史性剛嚴爲

政不阿事有妨於民者雖貴介千之亦必謝絕其清苦之
操尤爲罕儷卒於官至無以爲殮

王汝梅安肅人進士知益都縣器局博大才識通敏在任
數年不勞而理累官至都御史

楊植陽城人進士萬曆五年知益都縣縣有貧弱犯罪者
委曲宥之其豪強依勢者輒繩以重法事苟便民必從其
志與參政劉某平差役民免困累所親爲冢宰當入計始
終不一見然居官廉介人不能疵之累官至副使

荊州土山西臨晉人進士萬曆五年知臨朐縣居心惟寬
持法務平興學校清編審平徵收省勾攝善政種種難以

青州府志卷三十六

二十五

枚舉惟地畝一經清丈侵漁弊絕荒蕪稅豁民賴以安行
取御史百姓立祠祀之累官至都御史

李四維扶溝人舉人萬曆五年爲高苑縣教諭課士論文
寒暑不輟貧生餽遺卻弗受遷德平知縣

任讓南宮人萬曆八年進士知樂安縣爲政以誠愛民如
子賦完訟理綽有政聲行取禮科給事中

徐申景州人進士萬曆九年知壽光縣慈惠廉明有古循
良風

張貞觀沛縣人進士萬曆十一年知益都縣先是邑中田
賦不均差役煩重歲租弗完日事追呼貞觀至履勘田畝

去荒逋案肥瘠爲簿正應役者計畝出稅銀雇募期於便民上官嘉其制檄諸縣取法焉有劉某者與其族兄鬪目戕其妻誣之官以族兄擬抵經三勘無異貞觀閱其供詞疑之密訪得實乃突取其家人鞫之情狀盡露反其獄人頌神明行取給事中

熊元河南光州人進士萬曆十二年知安邱縣沈毅博雅本學術爲治術縣志久闕元倡議修輯屬筆於中丞馬文煒旁搜遠摭彙集成書百年曠典一朝大備自元始也沈應文浙江人進士爲青州府推官聽斷不事煩苛人服其明興學造士久而著績累官至刑部尙書

青州府志卷三十六

二十六

王道增潁州人進士爲青州府推官治獄持法不事鉤距人莫能欺萬曆十四年學宮頽壞捐俸修葺行取御史出按浙江人稱清正

張大謨直隸永年人進士萬曆十五年知諸城縣嚴懲姦吏愛民如子以縣地荒蕪令貧民願墾者得自陳告凡荒田不問年之久近地主有無開墾遂爲已業廬舍井竈卽立於其所名之曰官莊凡四十五處一時貧民胥賴以養焉行取御史官至山東巡撫

袁年吳縣人進士萬曆十六年知青州清廉執法一毫不
有豪宦侵民產者據法追正一無所循遷按察司副使

卒家無所積子孫清貧如寒素

王家相直隸平鄉人選貢生萬曆十六年知昌樂縣創建義倉增置學田修葺鋪舍申明法紀百廢俱舉有碑紀其政

馬從聘靈壽人萬曆十七年進士爲青州府推官外樸內瑩不爲赫赫之譽原情論法人稱明允行取監察御史累官至太僕寺少卿

李思孝直隸東明人進士萬曆十八年知昌樂縣縣瘠民貧盜賊蠭起思孝設法擒獲境內以清重編審均徭役吏胥不敢欺歲饑振卹開荒田五百餘頃逃亡復業遂稱樂

青州府志卷三十六

二十七

土行取江西道御史累官至河南巡撫

黃策陝西咸甯人進士知臨淄縣有善政累官至兵部員外郎

馬慤河南禹州人進士知臨淄縣政令嚴明盜賊屏迹民心大悅

魏體乾陳州人舉人知臨淄縣政簡刑清賢聲大著

張汝雨直隸柏鄉人舉人萬曆二十二年知臨淄縣創甃磚城立社倉乞緩征周貧乏三年內復流移千餘家積振穀二萬石作土勸農折獄明允遷解州知州

楊天民山西太平人進士由朝城調繁諸城縣察民利病

辨色視事訟者以次訊曲直各當其意以去公庭肅若秋
霜胥吏不得出一語縣兩稅故多重入之弊天民嚴稽覈
屏去奇羨會有倭警上官檄令守城天民但籍其名不擾
民業萬曆二十一年大侵民至屑草木爲食天民亟發倉
儲計丁口多寡自三斗至盈石爲例躬率倅尉各監一倉
盡日而畢又勸富民出粟逾百石者綽楔旌其門給放如
官廩法作粥以贍老弱至粥場輒泣下飢民病者手方藥
醫之修學宮及常山雩泉亭俾飢民傭工就食所活甚衆
鄰縣民嘯聚劫糧漸逼境內天民曰良民吾活之奸民不
可縱也捕其魁撻於市是歲租賦無所出天民緩其徵謂

催科政拙吾任之柰何取枵腹子曰事敲扑乎來歲大熟
民爭輸卒不以縮額爲累二十二年以內召去父老千餘
泣送數百里勒碑紀其政官至禮科給事中卒祀名宦
衛一鳳山西陽城人進士初任青州府知府質直明恕以
清儉自持練習政律不爲苛察粉飾之治而平刑祛弊動
中肯綮歲大侵奸民挾餓夫羣起搶掠一鳳取其魁重治
之發倉振卹變得不作會有倭警曰議兵餉諸猾惡少談
天測海奇詭百出一鳳第以鎮靜處之民以不擾再爲青
州兵備僉事民愈愛服累官至侍郎
胡士鰲詔安人進士知青州丰神開朗才識宏通在任未

久以擁護吳令爲礦使誣劾去官

常廷珪蒲城人舉人爲青州府同知敦厚練達持身謙慎
後代莒州政聲尤著

顧明範直隸棗強人舉人爲青州府同知嚴緝捕決疑獄
政聲大著累官至戶部員外郎

燕祖召平溪衛人舉人爲青州府同知時礦使陳增爲民
害祖召愆愚吳令上疏劾之縣多盜黨聚劫掠祖召擇其
強暴之尤者置之法一鎮奉若神明焉

吳宗堯歙縣人進士萬曆二十三年知益都縣時礦使陳
增挾勢索賂鄉民殷實者指以家有礦脈輒發卒折屋掘

青州府志卷三十六

二十九

地束縛劫掠盡所有而後已百姓如在湯火宗堯忿捕其
人置之法增復奪去宗堯乃密草疏劾增增賂近侍匿其
疏而反誣奏宗堯沮撓礦務宗堯下獄久之上知其冤釋
爲民以疾卒於家

馮文盛新昌人舉人萬曆二十三年知高苑縣縣地下每
多荒蕪文盛至招民開墾並給以牛種修縣志立社學築
河隄善政不可枚舉遷大理寺評事

王國翼遵化人進士萬曆二十三年知樂安縣懾服凶頑
保安善類覈制賦均里甲禁侵漁杜請託築城堞重學校
善政種種允稱治最後知青州賢聲尤著

顏悅道直隸魏縣人

舊志作元城人

進士萬曆二十三年知諸城

縣性明敏敢任事禦倭海上民賴以安權璫妄指縣有礦悅道正色曰若指怨家爲金穴是人人可供撲滿也力持不可事乃寢兩勘徭役皆平允增柔遠能邇等社招撫流民數百戶遷戶部主事民爲立生祠於琅邪臺上祀之張美陝西安化人舉人萬曆二十四年知昌樂縣建石城並甃大路爲石道民不告

孔貞棟萬曆二十五年爲高苑縣訓導淹貫博雅尤精史漢會文課士學政一新時縣志散佚縣令屬之秉筆貞棟廣搜博覽彙集成書焉

青州府志卷三十六

三十

鄭繼芳鹽山人

舊志作順天人

萬曆二十八年進士知益都縣發

姦摘伏人不敢欺行取監察御史

趙存誠陝西人選貢生萬曆二十八年爲青州府捕盜通判愛士惠民人皆德之建祠立碑於碧霞行宮之左日久祠圯碣石弗存其詳不可考

程試北直沙河人進士知壽光縣有賢聲再泣斯邑百姓迎之歡呼載道

王國政山西安邑人進士知壽光縣懲姦宄均田賦令欺匿者自首得地若干畝以治最聞

宋薦肥城人進士知壽光縣時歲凶盜起典史蔡天鳳捕

盜被圍薦親率民兵擒之盡置諸法

高邦佐襄陽人進士知壽光縣有清操遷戶部主事累官至巡撫

郭佳鎮邯鄲人萬曆二十八年進士知壽光縣賦性練達遇事勤慎凡所措置俱洽民心遷刑部主事

岑東曙萬曆二十八年爲昌樂縣教諭清慎自持作士有方

王允昌武進人萬曆二十九年進士爲青州府推官清慎廉明人望歸之內遷工部主事

王好善寶坻人萬曆二十九年進士爲青州府推官沈厚

青州府志卷三十六

三十一

質直斷獄慎重爲司理五年未嘗輕出入一人嘗攝縣篆帑藏支收無所濡染內遷工部主事

毛維騶薊州人萬曆二十九年進士知益都縣禮士愛民傾心撫字政事之暇與諸生論文不自知其爲縣令也累

遷至郎中

張登魏縣人歲貢生爲博興縣教諭以才能升知本縣公正清勤深得民心民爲立祠祀之

陸南至浙江仁和人

舊志作錢塘人

舉人知博興縣學識敏達宅

心仁厚政事之暇纂輯縣志文獻賴以不泯去後民不能忘立石志焉

高節河南祥符人萬曆二十九年進士知博興縣有異政

又祥
壽光

王雲龍長垣人進士萬曆二十九年知臨朐縣氣質端方
材猷諳練待民務爲寬厚輕徭緩征一毫不染以憂去士
民泣送者百餘里不絕

孟楠北直濬縣人進士萬曆三十年知樂安縣甫蒞任卽
檢二巨懟民賴以安修縣志葺學宮有廢俱舉秩滿擢主
政

冀懋忠上蔡人萬曆三十二年進士知益都縣才識通敏
理煩善斷百姓賴以無擾去後民猶思之

青州府志卷三十六

三十一

孫振基陝西潼關人進士萬曆三十二年知安邱縣廉介
明決出於天性除積弊禁侵漁賦完訟理一縣懾服行取
給事中

陳繼徵秀水人萬曆三十五年進士知益都縣約已愛民
動遵禮度人咸敬之以疾卒子萬言義不受賻百姓泣送
者塞道

高節祥符人辛丑進士由博興調繁壽光縣以民好誣訟
凡訟詞三四覈始定人不能欺澆風遂革歲蝗旱再請振
蠲民免餓殍先是青州進士魏某者爲開封司理醉笞節
至醫無膚及來爲宰值魏已死弗報怨於其子人稱爲長

者行取南京給事中

王國相陝西高陵人萬曆三十五年進士知壽光縣縣俗刁悍嘗結衆欺寡凌弱國相至立除其弊凡憑勢武斷者皆撿治之徵輸不取奇羨有富人詭賦藩王府中國相覈實其弊立除又藩府來爭民葬地國相據法折服闔宦不敢肆虐卹貧乏拯荒疫施棺木築河防善政備舉一時賢令推首出焉遷戶部主事累官至山西布政使

沈自彰江南上元人進士萬曆三十五年知昌樂縣嘗銘左右曰不剝民肥已不緩德峻刑不徇私枉法及涖政皆如其銘

青州府志卷三十六

三十三

張大武雄縣人進士萬曆三十五年知臨朐縣愜悞無文愛民禮士催科不事鞭扑而民自樂輸遷戶部主事

虞德隆南直金壇人進士萬曆三十六年知安邱縣先是徭役不均德隆至重編審謝請託差役稱產除胥吏積弊減賦稅羨餘政聲大著性好學尤愛文士簿書之暇輒進諸生講藝雖終日無倦容科名以興遷南京吏部主事

劉可訓湖廣澧州人舉人萬曆三十八年知昌樂縣均徭賦省刑獄民歌頌之

李凌雲南直華亭人進士萬曆中知諸城縣嚴清吏弊豪猾斂迹會大旱凌雲以鐵檄投龍湫立大雨霑足後被召

去以假歸里縣復旱百計祈禱不應父老走華亭乞凌雲書幣凌雲笑曰前在諸城以天子命吏禱雨故應耳今去汝久無能爲也父老曰惟公能活吾屬乞一札足矣凌雲不得已乃具書侑以四物有玉章一方父老歸焚書投壁澍雨果足明年再旱走華亭乞書復驗焉

任簡爲青州衛經歷清慎自持每有委任一塵不染敝衣疏食六年如一日職滿遷官人咸思之

魏學張陝西人貢生爲益都縣主簿性剛介人莫敢干以私金嶺驛馬戶舊制雇役猾吏姦民欲派鄉閭邑以大擾學張力爭之得如舊人爲立祠於北郭祀之

青州府志卷三十六

三十四

毛焯陽信人舉人爲益都縣教諭有學識勤課士諸生有不給者時周卹之五年遷吳橋知縣

包瑜青田人爲臨淄縣教諭以文學著於時

李蔭河南內鄉人舉人爲臨淄縣教諭善屬文教諸生有法士之貧者恒周之遷陽穀知縣終刑部主事

鄭禮陝西澄城人爲臨淄縣教諭約已訓士無忝師範遷信陽知縣累官至兩淮鹽運使

陳榮長安人舉人署博興縣教諭好學能文教諸生有法操守尤端非公事不謁縣令人皆稱之

劉楠利津人歲貢生以蒙陰訓導遷博興縣教諭孝友剛

方動以廉恥自厲人謂其教比蘇胡云

張修德臨清州人爲臨淄縣訓導好學善詩以博雅爲諸生所服

自任簡至張修德凡九人見於鍾志其年皆不可考以鍾志成於萬曆四十三年故置於此

高第灤州人進士萬曆四十年爲青州兵備副使廉明端謹持法堅定強宗豪猾皆重繩之遇窮民加意撫摩如恐傷者又刻呂氏刑戒以訓諸官屬士民莫不感激遷湖廣參政

王家賓定興人進士萬曆四十年知青州敷政明刑以仁

青州府志卷三十六

三十五

愛爲主聽訟不事鞭扑而能自得其隱有殺人而嫁其罪於讐者經數官不能白家賓一鞠卽服驛夫領站銀八百兩收丞內室夜被盜上下皆疑丞自竊之家賓曰烏有是哉第急捕盜盜迫取半投驛井中而書門上以誣丞衆愈疑家賓不爲動捕盜愈急卒得盜方忠等人服其識強宗大豪犯法者一律懲治卹孤貧置義冢修書院葺橋梁善政備舉歲饑請於上官開倉振濟民咸德之遷青州兵備僉事

李焯長垣人進士萬曆四十一年知青州時值大禋之後凋瘵未蘇焯殫力拊循勤勸課嚴封守招流移豫積儲昕

夕勤劬人以食少事煩規之焯笑曰死生有命安能泄泄爲也竟以積瘁卒於官郡人請祀名宦焉

柴寅賓長垣人進士萬曆四十一年知青州心存端恪政尚寬平果敢任事而精力能以運之湔洗冤獄能伸民隱有李某者爲豪強誣陷獄已成寅賓廉知其冤出之反坐豪強一郡懾服歲大旱虔心步禱澍雨輒足有天生瑞芝之祥犒戍卒練鄉勇除浮稅禁侵漁禮賢下士善政不可勝舉論者以爲綜核微密如魏弱翁被服儒雅興學立教又如文翁云

趙行志項城人萬曆四十一年進士知益都縣斷獄慎重

青州府志卷三十六

三十六

能體民隱羣情悅服

戴元威常熟人知臨淄縣威儀端肅爲政有體

李長春興濟人萬曆四十一年進士知臨淄縣通形家言以邑鮮科第改建學宮人文以興性仁愛爲政清介不苟僅三月以憂去

錢邦偉丹徒人萬曆四十三年舉人爲青州府同知約已愛民禮賢好士一郡稱之

李延芳陝西整屋人舉人萬曆四十三年爲青州府通判分署在顏神鎮其地險阻人多獷悍蒞政之初卽立科條申明約束期於必行強暴者置之法一鎮懾服

門克新河南汝陽人進士萬曆四十三年爲青州府推官
丰采嚴峻姦吏斂迹凡有聽斷民皆懾服

王夢尹甯晉人進士萬曆四十二年知臨淄縣時徐鴻儒
以白蓮教倡亂兗西縣人有列名於其籍者懼誅欲應之
夢尹委曲諭以利害曰汝等愚民初無亂心第以被誘入
教耳吾今爲汝明立自首之案彼雖有籍何慮哉且爾縱
不顧身獨不顧父母妻子乎衆感泣立即解散尋調益都
亦以治最稱

王在公崑山人舉人知高苑縣縣多水民患之在公築隄
捍禦水不爲灾歲饑煮粥以食餓者全活甚衆遷濟南府

青州府志卷三十六

三十七

同知

羅衣山西清源人貢生萬曆四十三年知高苑縣歲大稔
羣盜蠶起衣殲其渠魁餘黨悉平散牛種寬徭賦除弊興
利善政備舉以誑誤去官民爲勒石記之

王杼商邱人進士萬曆四十三年知壽光縣恬淡寡欲愛
民如子其有弗類者輒創懲之修丹河隄民無水患練卒
儲餉助平滕縣妖寇政績大著遷南京吏部主事

胡良機江西南昌人萬曆四十四年進士初受臨淄知縣
政績甚著會益都令欽取入都上官以附郭煩劇難其人
郡守以良機聞遂調任焉既至恩威並濟卹困窮發欺隱

裁羨賦招流移鋤強撫弱善政備舉民間有青天之譽
張道一故城人舉人萬厯間爲青州府同知明慎有執持
不我才智先人而措置允當嘗攝郡縣海防練兵覈餉俱
有方略上官咸獎藉之

羅繼宗南昌人舉人萬厯間爲青州府同知以廉謹自持
屢攝縣篆爲民興利除害以疾致仕行李蕭然時稱其恬
退云

賈傳芳威縣人官生萬厯間爲青州府通判識趣超朗操
履清潔公署不嚴而肅剖決不怒而威藹然之風見於交
際嘗視縣篆勤於民事秋毫不染遷膠州知州

青州府志卷三十六

三十八

李述武邑人萬厯間知博興縣清案牘戢姦頑催科有法
吏民畏之

楊子鳳北直無極人萬厯間知博興縣存心惠愛涖政嚴
明易粟捕蝗禱雨請振裁防河鎗手里社老人諸弊徵民
租賦一遵前令李公遺規民歌曰楊父好官差役不歡

唐文煥陝西富平人進士萬厯間知諸城縣縣大蝗文煥
禱於神蝗赴海死未翼者大鳥羣食立盡或作蝗異傳志
之安邱飢民爲亂鄰縣響應獨縣人不敢發旁邑有巨盜
皆檄文煥平治之時比歲不登骼胔徧野飢民爭鬻子女
文煥請發粟振貸爲粥食之或不能徧下輿抱飢者痛哭

遣人赴淮杭招商賈以通有無鄰縣賴以全活者甚衆縣人爲立生祠直指疏薦遷吏部主事

楊時華陝西延安衛人萬厯間由鞏昌府訓導遷諸城縣教諭性嚴正好惡無所偏諸生餽遺任其厚薄不與較遷甯夏中衛教授

徐東漸齊河人舉人萬厯間爲諸城縣教諭好學愛士令諸生各立文會親定甲乙風雨不輟或有无妄之灾輒振拔之遷直隸大城知縣

王紹緒壽張人萬厯間由新城訓導遷諸城縣教諭性慈惠常捐俸以佐諸生膏火署縣印數月門無苞苴升山西

青州府志卷三十六

三十九

澤州學正

仲嘉浙江秀水人進士天啟元年知昌樂縣嚴以御盜惠以待民政聲大著

羅世錦陝西兩當人天啟二年進士知臨淄縣政尙樸誠愛民如子百姓親之

胡克開四川隆昌人進士天啟二年知樂安縣徵收有法民無催科之擾嚴盜賊清吏弊宵小屏迹人稱良吏

郭人吉山西太原人舉人天啟二年知臨朐縣徵收有法民無逋賦斷決疑獄有神明之望

耿允樓北直靈壽人天啟五年進士知臨淄縣沈毅有謀

略時妖人郭金冠王元菴等煽惑邑人禍幾不測允樓以計擒其渠魁袁一本等置之法四境帖然

黃鎮元河南商城人舉人天啟五年知樂安縣縣有疑獄株連甚衆鎮元立判之盡得釋又旱蝗捕之有法稼不爲害卒於官

張于京陝西褒城人恩貢生天啟五年知臨朐縣勞心撫字加意作養學宮月課拔孫席慶張侗劉允祺等朝夕引掖無倦容又善書工詩諸生多珍藏之

張魯得崑山人進士天啟七年知昌樂縣政尙廉平有德惠於民

青州府志卷三十六

四十

張文燧北直通州人進士崇禎初知益都縣性嚴正敢任事義所當爲毅然不爲世家所阻撓在任七年始終如一

韓法愈河南鄆陵人進士崇禎元年由堂邑調繁益都縣撫字寬仁讞獄平允廉潔自持絲毫不取於民卒後囊橐蕭然至無以爲殮邑人高有聞厚賻之始得歸葬士民悼焉

汪喬年浙江遂安人進士崇禎二年由工部郎中出知青州歲大饑捐俸振濟不足又勸富室輸粟助之全活甚衆屬縣解額歲常例約四萬金悉免之郡城北垣頽壞捐俸

刻期修築性慈祥鞫獄平允每出聽事廊廡下置土銼十餘處令訟者自炊候鞫吏胥無敢索一錢者累官至兵部尙書總督三邊以勦流寇襄陽罵賊而死

國朝康熙五十八年郡人立祠祀之

劉芳奕河南洛陽人舉人崇禎六年知昌樂縣甫泣任卽修外城又於城南五里築壩引丹水西流爲月河兩月蔽事民病之芳奕去土寇蠶起一縣資爲保障乃尸祝焉須用掄武進人舉人崇禎七年爲青州府推官處心平允斷事公明查盤所到風節凜然考較名士出疑獄大辟十有七人有大姓辛某欲奪繼逐其叔之寡妾並害其遺孤

青州府志卷三十六

四十一

用掄嚴鞫置之法得保全其家及署府事解衡王糧剔除扣剋積弊學校城池教場倉庫俱經修葺是時兵餉告急用掄裁各屬雜費得節羨三千七百餘金報官充餉不費民間一錢百姓德之去後杜門著書易簣之日諸子請所屬但云學吾清學吾勤無一言及家事索筆書云忽然大悟赴莊周義易天心始可求兩袖清風吹鶴冷一簾疎雨伴弓愁百年哀墓頻添酒十載殘書好服疇定省萱堂宜努力封章早報玉樓頭投筆而逝出處死生可謂無間然矣

張國卿陝西長安人舉人崇禎七年知安邱縣廉幹有威

公編審勤鞫獄教民孝弟力田有強暴數人爲邑害悉案治之四境翕然

翁兆雲浙江慈谿人舉人崇禎八年知博興縣以鄭丞規畫稻田毀於洪水兆雲履畝巡視築河隄數十里教民藝稻水利復興

房建極陝西三原人進士崇禎九年知安邱縣未及涖任卽遇苦旱建極齋禱於路入境輒雨歲復大蝗建極捕除有法稼不爲災減浮稅除盜賊築敵臺數處以資保障政事之暇尤加意於人才月必兩集士子於學宮親第其藝更出私藏以供膏火在任三年科第以興卒以忤上官左

青州府志卷三十六

四十二

遷人皆冤之後四十餘年邑人請祀名宦益可以證其行事矣

張紹栳北直清苑人舉人知臨淄縣博學能文公餘輒進諸生講藝竟日不倦科第以興

文昌時全州人舉人崇禎十年知臨淄縣以廉惠得民值兵燹悉力守陴城破與訓導申周輔舉家死焉

鄒逢吉江西九江人進士崇禎十三年知臨淄縣在任數月流寇竊發保撫殘黎諸務維新創建敵臺十處一縣恃以無恙

劉昇祚山西汾陽人進士崇禎十三年知壽光縣縣城舊

爲土墉昇祚至慨然謂邑人曰壽光爲濱海大縣而城之卑圯如是設一旦有警爾父老子弟其何以守於是鳩衆力斃以塼不浹歲而成

劉今尹滄州人進士崇禎十三年知安邱縣平易近人不寬不猛壬午冬

大兵猝至攻西北城今尹誓衆死守與守備李景隆等登陣捍禦

大兵鉤援乘墉上而復墜者三雉堞盡毀矢落如雨城頭死傷鱗次而衆志益固攻逾三時圍遂解先是城無敵臺今尹至始修敵臺四座城賴以全

青州府志卷三十六

四十三

楊復亨陝西咸甯人舉人崇禎十五年知昌樂縣有全城功

辛炳翰陝西渭南人貢生崇禎十五年知昌樂縣有禦寇全城之功

朱之裔順天大興人進士崇禎時以參議分巡青州每讞大獄止訊巨魁餘悉縱遣上官嘗病其失出之裔曰民之甘於從盜者正以株連懼罪爾若縱遣之後能改悔卽爲良民若仍復煽誘則亦巨魁也人服其言進副使奉檄入都家屬在濟南十五年城破母李氏妻馮氏及其子皆死之後之裔巡撫大同流賊陷城自經死

康溥陵縣人歲貢生崇禎時爲臨朐縣教諭博學善屬文
下筆千言立就家居時卽知名海內及涖任周貧乏抑豪
強敦倫飭紀教諸生有法論者以爲德行文章可以維持
風俗者當以溥爲第一云

李茂實陝西人選貢生崇禎末爲青州府通判以奉檄征
萊蕪新泰土寇沒於陣

舒萬化江西玉山人貢生崇禎末知博興縣甲申冬

大兵臨城萬化登北門樓見守者有懼色以義勉之曰我
爲王臣爾爲王民敢不效死乎矢石交下攻者稍卻忽聞
城西北隅陷守者擁之下城萬化急走入宅衣冠束帶從

青州府志卷三十六

四十四

容自經死

周啟元湖廣黃岡人崇禎末知高苑縣城破死之

李耿北直大興人進士崇禎末知壽光縣城破自經死

沈季佐崇禎末爲博興縣典史聞變戎服巡城攻者登陴

季佐連殺二人知勢不敵自刎死祀名宦

張述海豐人崇禎末爲博興教諭城陷死之

王象益新城人歲貢生崇禎末爲博興縣訓導城破夫婦

被執不屈死祀名宦

郭純崇禎末爲博興縣訓導有老僕勸出南門履冰竊逃
純曰旣食祿身將焉逃遂以頭觸壁而死

趙千里崇禎末爲諸城縣訓導城破被難同時死者又有

徐李二人皆訓導逸其名

明制訓導二人其一或得代未行者歟

李士元直隸通州人身長面黑有膂力由行伍積功至青州守備崇禎壬午冬

大兵略地東省士元登陴誓守當城西北隅其地在范公亭南林木叢翳而

大兵萬騎陣於堯山之溫家窪潛度地形越三日率衆東去城守者皆解嚴熟寢士元獨不寐至夜半聞城外犬吠俯堞而窺則

大兵已至城下士元大聲疾呼守陴者驚覺皆走散士元

青州府志卷三十六

四十五

立馘一人乃止急燃大礮擊之不能中乃倒提礮尾以羶帽窒其口附堞而發響如轟雷雲梯壞攻者殲焉

大兵雨射城中士元袒立不爲動而意氣愈壯

大兵以城堅不可攻拔營東去城中百姓皆以手加額曰微將軍城其屠矣明年癸未三月

大兵率衆西返去郡城六十里下砦於瀾水涯四十餘日上遣重兵護衛衡藩督率范至完頓兵王乘埠鍾將軍軍曉東門經略王永吉趙敬塘軍車轅門總兵劉澤清駐師古西關相連絡爲犄角之勢衆凡數萬人日視兵士焚掠村舍人莫敢攖而澤清一部尤橫恣狡譎反首鼠兩端爲

襲城之計乘夜假冒

大兵攻城士元亦備預甚嚴燃萬人敵焚殺百餘人遂緣夜遁去甲申三月李自成陷燕京僭尊號所遣僞官姚將軍以五百人鎮青皆鐵衣繡鬚以紅帕蒙首勢甚張城中惴惴不自保未幾吳三桂合

大兵蹙燕都自成西遁士元探知懼青被害徬徨計無所出適姚將軍開讌於邢尙書宅士元率其麾下健卒數十人若將進謁之狀姚倉皇離席起立士元直前踊身越几斬姚於坐上其左右皆披靡士元大呼曰爾知吳某引兵百萬已滅闖賊乎動者悉視姚將軍願留者聽不者解甲

去是時城中萬戶無不屏息以聽士元於是介胄入見衡王曰神京失守闖賊西竄社稷無主中原鼎沸王親憲皇之子孫據全齊形勝之地山東豪傑荷戈礪刃大者數萬小者千百爲羣引領以望義師之起勝兵百萬可傳檄而集南塞大峴之口北扼河濟之衝鼓行而西以光復我明舊物將見燕薊士女皆簞食壺漿以迎王師誰復有與大王爭衡者不然今坐失事機萬一瞻烏靡定異姓代興彼時下尺書以徵王王豈能常享藩封乎王素懦又吝財趨趨不敢對士元知事不可爲乃棄官怏怏歸里俄而大清定鼎燕京遣兩固山安集青郡士元亦隨行至青踰

月而有趙應元之變應元爲自成餘黨持僞符乘傳至青據城以叛殺總督王鼇永事出倉猝人情恐懼兩固山以士卒少欲請禁旅以濟師士元方勦高密土寇聞變疾馳至青入見兩固山曰以城中居民皆脅從非誠心附賊脫大兵一至城破則玉石俱焚濫及無辜其若全城子姓何遂緩裝徒步通謁應元曰將軍據青已月餘矣孤城自畫不能拓尺寸地以張威令將坐守青州南面以自王耶抑或藉朝廷之命專制一道之爲得耶將軍士卒不滿千人爲將軍城守者不過攝將軍威目前爲自全計非能拊循而用之也戰則不能守則不可援兵外集內變將作必有

以將軍爲奇貨者譬如弈中之虎坐受縛矣應元士卒少又傳禁兵將至不無內恐聞言色變曰將軍爲我謀柰何曰是莫若與諸帥和而令撫軍公疏請於朝言公入青祇以總督虐民誅之其餘不戮一人今復以全城歸命天子則通侯之賞可立至矣應元曰惟君命士元乃導應元出謁諸帥而令以甲士數百人隨是晚遂令應元張筵招飲讌於郡北門之瞻辰樓至則鑽刀歃血而誓兩固山各伏兵城外以俟士元業先與城中居民約聞礮聲則啟扉再則各家以牀几之屬屯中衢三則闔戶寢息聽街市有聲無譁時夜漏二下酒酣樂作金鼓喧闐與城柝相亂

而礮響忽發士元佯愕然曰此何爲者應元曰豈營卒有竊發者耶行誅之矣及再發士元起謂應元曰君當有他謀矣信誓旦旦之謂何而乃中變乎應元方錯愕無以應倏而三發士元乃以左手握應元右臂怒目左右視僞爲與應元耳語狀因攜手至睥睨間俯堞欲語以右手掣刃斬應元於城上從者潛抽利刃所殺凡數十人餘皆散走而三礮時先約伏兵殺守門卒納我軍諸從賊以通衢什器隔閔無一人得脫抵曉居民啟戶皆屍橫於市方藉藉言今夜三鼓李將軍已斬趙賊首矣方是時微士元計以重兵圍城困獸猶鬪勢必多殺良民則活青州之數萬生

靈者非士元而誰哉事既定部牒新選一參戎至士元仍遁迹田里後二十年有人於燕市中見士元鬻馬絡以自給云

鄭安國浙江紹興人爲博興縣丞縣多洲水利不興安國相度形勢引水以灌田教民種稻沿河之民賴以殷富

國朝康熙五十八年知縣李元偉建祠祀之

王用眞定人監生爲壽光縣丞剛正明決毫無污染

劉允明昌平人歲貢生爲壽光縣丞綜理周詳盡心厥職邑人稱之

劉淳巢縣人監生爲壽光縣丞嘗攝縣篆有以急催科勸

之者答曰吾豈忍以元元之命博一能吏聲耶其廉以自守如此

李軒河南通許人舉人爲壽光縣教諭學問通博好惡不苟能以禮繩人遷萊陽知縣

于珊江陰人歲貢生爲壽光縣教諭教士以敦實行爲本人咸重之

方清江西浮梁人貢生爲壽光縣教諭好學能文教諸生有法數年之間前後登第者二十餘人皆其力也

王澤民保定人歲貢生爲壽光縣訓導性廉正好以德行誨人

自鄭安國至王澤民凡八人皆無年可考故置於此

又安邱縣志典禮考名宦祠有姬文郁無傳

縣志本無傳